

Headline	PKNS labur RM200 juta majukan Bandar Baru Bangi
Date	18. Aug 2008
Media Title	Harian Metro
Section	Bisnes
Circulation	336603
Readership	2192000
Language	MALAY
Page No	26
Article Size	177 cm²
Frequency	Daily
Color	Full Color
AdValue	2277.42



PKNS labur RM200 juta maju Bandar Baru Bangi

PERBADANAN Kemajuan Negeri Selangor (PKNS) akan melabur RM200 juta bagi memajukan empat peratus lagi baki harta tanah di Bandar Baru Bangi yang akan dibangunkan secara berperingkat dengan pelbagai kemudahan serta jenis kediaman.

Kontroler Pembangunan PKNS kawasan Bangi, Siti Zubaidah Haji Abd Jabar, berkata jika projek berkenaan siap kelak ia dijangka mampu memberi pulangan kira-kira RM80 juta kepada PKNS.

Beliau berkata projek berkenaan yang kini dalam proses perancangan serta reka bentuk akan membabitkan pembinaan pusat membeli-belah, rumah bandar, rumah teres dua tingkat, lot kedai dan bangunan pejabat.

"Kami yakin baki empat peratus yang terletak di tengah kepesatan Bandar Baru

Bangi akan melengkapkan lagi pembangunan berterusan bandar berkenaan yang sebelum ini dibangunkan dari ladang kelapa sawit kepada bandar ilmu dan kini mempunyai nilai harta tanah amat tinggi," katanya.

Menurutnya, Bandar Baru Bangi yang dibangunkan PKNS kini bertukar menjadi sebuah kawasan pertumbuhan yang sangat diminati dan menjadi rebutan masyarakat selepas Shah Alam.

Beliau berkata, dalam tempoh 34 tahun, PKNS memajukan lebih 94 peratus kawasan seluas 1,865 hektar di Bangi dengan pelbagai projek yang kini menempatkan 96,000 penduduk.

"Apabila pembangunan Bandar Baru Bangi siap dua tahun lagi, penduduknya akan mencecah 100,000 dengan pelbagai kemudahan lebih selesa disediakan untuk mereka," katanya.

Siti Zubaidah berkata projek yang terletak dalam lokasi komersial berkenaan dijangka siap sepenuhnya pada 2012 dan ia masih mengekalkan konsep bandar ilmu dengan pelbagai aktiviti dirancang untuk kemudahan penduduknya.

Bandar Baru Bangi yang terletak di antara Kajang dan Putrajaya, ia hanya 25 kilometer (km) dari Kuala Lumpur dan hanya 15 minit dari Lapangan Terbang Antarabangsa Sepang.

Bertepatan dengan konsepnya sebagai bandar ilmu, kawasan sekitarnya mempunyai 18 pusat pengajian tinggi, enam sekolah rendah dan tiga sekolah menengah.

Antara pusat Pengajian tinggi yang ada termasuk Universiti Kebangsaan Malaysia (UKM), Universiti Pertanian Malaysia (UPM) dan Kolej Universiti Islam Selangor (Kuis).